



**Grad Sarajevo**  
**City of Sarajevo**

Bosna i Hercegovina  
Federacija Bosne i Hercegovine  
Kanton Sarajevo  
Grad Sarajevo  
**GRADSKO VIJEĆE**

**ODLUKA**  
**O DAVANJU SAGLASNOSTI NA PROGRAM AKTIVNOSTI ZA DAN**  
**OBILJEŽAVANJA SJEĆANJA NA ŽRTVE GENOCIDA U SREBRENICI**  
**ZA 2025. GODINU**

*Sarajevo, oktobar 2024. godine*

**Adresa:** Hamdije Kreševljakovića 3  
71 000 Sarajevo  
**Tel.:** +387 33 216 659  
**Fax:** +387 33 205 874  
**Email:** [gsgv@sarajevo.ba](mailto:gsgv@sarajevo.ba)  
**Web:** [gradskovijece.sarajevo.ba](http://gradskovijece.sarajevo.ba)





Grad Sarajevo  
City of Sarajevo

Bosna i Hercegovina  
Federacija Bosne i Hercegovine  
Kanton Sarajevo  
Grad Sarajevo  
**GRADSKO VIJEĆE**

Na osnovu člana 31. stav (1) tačka b) Statuta Grada Sarajeva („Službene novine Kantona Sarajevo“, broj 7/23), člana 3. stav (2) Odluke o obilježavanju Dana sjećanja na žrtve genocida u Srebrenici („Službene novine Kantona Sarajevo“, broj 25/22), Gradsko vijeće Grada Sarajeva, na 43. sjednici održanoj dana 09.10.2024. godine, donijelo je

### *ODLUKU*

## *O DAVANJU SAGLASNOSTI NA PROGRAM AKTIVNOSTI ZA DAN OBILJEŽAVANJA SJEĆANJA NA ŽRTVE GENOCIDA U SREBRENICI ZA 2025. GODINU*

#### **Član 1.**

#### **(Davanje saglasnosti)**

Ovom odlukom daje se saglasnost na Program aktivnosti za Dan obilježavanja sjećanja na žrtve genocida u Srebrenici za 2025. godinu (u daljnjem tekstu: Program), utvrđen od strane gradonačelnice Grada Sarajeva.

#### **Član 2.**

#### **(Davanje ovlaštenja)**

Ovlašćuje se gradonačelnica Grada Sarajeva da za potrebe realizacije Programa formira Organizacioni odbor, kao i da preuzima sve ostale aktivnosti potrebne za uspješnu realizaciju Programa.

#### **Član 3.**

#### **(Sastavni dio Odluke)**

Sastavni dio ove odluke je Program aktivnosti za Dan obilježavanja sjećanja na žrtve genocida u Srebrenici za 2025. godinu.

#### **Član 4.**

#### **(Stupanje na snagu)**

Ova odluka stupa na snagu narednog dana od dana objavljivanja u „Službenim novinama Kantona Sarajevo“.

*PREDSJEDAVALAČI GRADSKOG VIJEĆA*

*Jasmin Ademović, s.r.*

Broj: 01-GV-02-1229/24  
Sarajevo, 09.10.2024. godine

Adresa: Hamdije Kreševljakovića 3  
71 000 Sarajevo  
Tel.: +387 33 216 659  
Fax: +387 33 205 874  
Email: [gsgv@sarajevo.ba](mailto:gsgv@sarajevo.ba)  
Web: [gradskovijece.sarajevo.ba](http://gradskovijece.sarajevo.ba)





Na osnovu člana 3. stav (2) Odluke o obilježavanju Dana sjećanja na žrtve genocida u Srebrenici („Službene novine Kantona Sarajevo“, broj 25/22) utvrđujem:

**PROGRAM  
AKTIVNOSTI ZA DAN OBILJEŽAVANJA SJEĆANJA NA ŽRTVE GENOCIDA U  
SREBRENICI ZA 2025. GODINU**

**I UVOD**

Odlukom o obilježavanju Dana sjećanja na žrtve genocida u Srebrenici („Službene novine Kantona Sarajevo“, broj 25/22) propisano je da konačni Program aktivnosti za Dan obilježavanja sjećanja na žrtve genocida u Srebrenici utvrđuje gradonačelnica Grada Sarajeva i predlaže Gradskom vijeću usvajanje Odluke o davanju saglasnost na Program aktivnosti za Dan obilježavanja sjećanja na žrtve genocida u Srebrenici za narednu godinu. U izradi Programa aktivnosti za Dan obilježavanja sjećanja na žrtve genocida u Srebrenici konsultovan je i Savjet gradonačelnice za Informativni centar o Međunarodnom krivičnom sudu za bivšu Jugoslaviju (u daljnjem tekstu: Informativni centar Sarajevo). Savjet gradonačelnice za Informativni centar Sarajevo prihvatio je predloženi Program. Uzimajući u obzir nadležnost Savjeta, utvrđenu potpisanim Memorandumom o razumijevanju između Međunarodnog krivičnog suda za bivšu Jugoslaviju i Grada Sarajeva za razvoj Informativnog centra Sarajevo („Službene novine Kantona Sarajevo“, broj 50/16), kao i njegov sastav. U Programu su uvažene sugestije Savjeta.

**II RASPORED I OPIS AKTIVNOSTI ZA DAN OBILJEŽAVANJA SJEĆANJA NA  
ŽRTVE GENOCIDA U SREBRENICI ZA 2025. GODINU**

**Naziv aktivnosti:** „ŠTO TE NEMA“ laboratorij i radionica: *Moć sjećanja: Suočavanje s prošlošću za izgradnju mirnije budućnosti za mlade iz cijele BiH.*

**Lokacija:** Historijski muzej Bosne i Hercegovine

**Vremenski okvir:** 01.07.2025. godine

**Satnica:** cjelodnevno

**Učesnici aktivnosti:** delegacije Grada Sarajeva, strane delegacije, diplomatska predstavništva u BiH, delegacije, predstavnici različitih nivoa vlasti u BiH, predstavnici relevantnih udruženja, umjetnici, učenici i studenti.

**Obrazloženje:** Povodom obilježavanja 30. godišnjice genocida u Srebrenici, organizacija „ŠTO TE NEMA“ u saradnji sa Gradom Sarajevo odnosno Informativnim centrom Sarajevo organizovat će niz aktivnosti i događaja na različitim lokacijama u cilju kreiranja što bogatijeg programa obilježavanja.

*Šta bismo trebali zapamtiti, a šta zaboraviti, i zašto? Kako se možemo suočiti s traumatičnom prošlošću na produktivan način?*

Razgovarat ćemo o ulozi javno vidljivog sjećanja i njegovom potencijalnom uticaju na pitanja poput pomirenja i isceljenja nakon sukoba, te kako procesi sjećanja, svjesno ili nesvjesno, oblikuju sadašnjost i budućnost. Radionica će se baviti pitanjima sjećanja (i zaborava) s dalekosežnim posljedicama, te će ovakve aktivnosti biti od vitalnog značaja za institucije

**Adresa:** Hamdije Kreševljakovića 3

71 000 Sarajevo

**Tel.:** +387 33 407 443

**Fax:** +387 33 208 341

**Email:** grad@sarajevo.ba

**Web:** www.sarajevo.ba



kulturnog sjećanja koje se bave prošlošću kako bi se razumjela sadašnjost i izgradila mirnija budućnost.

Spomenici kao alat za izgradnju zajednice, aktivizam i povrat javnog prostora - performativno predavanje umjetnice Aide Šehović za mlade iz cijele BiH.

Kako možemo dizajnirati spomenike koji su inkluzivni i relevantni za budućnost? Da li je moguće da zajednice na kolektivan način zamisle i ponude nove oblike javnog sjećanja? Primjeri spomenika iz cijelog svijeta koji se bave pitanjima sjećanja, pripadnosti, žalovanja i iscjeljenja na aktivan način u svojim zajednicama bit će predstavljeni i analizirani.

**Naziv aktivnosti:** Diskusija „Kultura sjećanja kao strategija protiv zaborava, poricanja i revizionizma” u formatu otvorenog stola sa akademikima, istraživačima i umjetnicima.

**Lokacija:** Multimedijalna sala Informativnog centra Sarajevo smještenog u sarajevskoj Vijećnici

**Vremenski okvir:** 02.07.2025. godine

**Satnica:** naknadno (u prijepodnevnim satima)

**Učesnici aktivnosti:** delegacije Grada Sarajeva, strane delegacije, diplomatska predstavništva u BiH, delegacije, predstavnici različitih nivoa vlasti u BIH, predstavnici relevantnih udruženja, akademici, umjetnici, istraživači, učenici i studenti.

**Obrazloženje:** Diskusija otvorenog stola, kao platforma za izgradnju mira. u kojoj će uzeti učešće relevantni pojedinci koji će podijeliti svoja iskustva na osnovu provedenih istraživanja na temu revizionizma, strategije protiv zaborava i poricanja prošlosti. Ovakva diskusija će doprinijeti harmonizaciji društva, obnavljanju društvenog tkiva te pružiti mogućnost kreiranja novih ideja i projekata koji će doprinijeti izgradnji spomenika kulture sjećanja, te senzibiliranju zajednica pogođenih sukobima.

**Naziv aktivnosti:** Prikazivanje dokumentarnog filma „ŠTO TE NEMA“ u režiji Mirka Pincellija

**Lokacija:** Kino Meeting Point

**Vremenski okvir:** 02.07.2025. godine

**Satnica:** naknadno (očekuje se projekcija u poslijepodnevnim satima)

**Učesnici aktivnosti:** delegacije Grada Sarajeva, strane delegacije, diplomatska predstavništva u BiH, delegacije, predstavnici različitih nivoa vlasti u BIH, predstavnici relevantnih udruženja, akademici, umjetnici, istraživači, učenici i studenti.

**Obrazloženje:** Dokumentarni film ŠTO TE NEMA (89 minuta) u režiji Mirka Pincellija za mlade iz cijele BiH i širu zajednicu. Trideset godina nakon genocida — prvog u Evropi od Drugog svjetskog rata — preživjeli u Bosni i Hercegovini i dalje tragaju za svojim najmilijima koji su nestali. „ŠTO TE NEMA“ prati povratak bosansko-američke umjetnice Aide Šehović i njenog participativnog, nomadskog spomenika genocidu u Srebrenici. Nakon petnaest godina putovanja svijetom, spomenik konačno dolazi na svoje konačno odredište, a preživjeli se okupljaju na mjestu stradanja kako bi u hiljade fildžana nasuli kafu u znak sjećanja na žrtve. Dok kolektivno tuguju, bolna pitanja i dalje odjekuju: Šta znači „nikad više u svijetu u kojem počinitelji ostaju nekažnjeni? Kako umjetnost i empatija mogu pomoći u ispunjavanju praznine koju za sobom ostavljaju neizmjerni gubitak i trauma? Film je također premijerno prikazan tokom 30. Sarajevo Film Festivala, te se sada pruža publici ponovna prilika da ga pogledaju u kinu Meeting Point.

**Naziv aktivnosti:** Trening i obuka za aktivnosti vezane za kreiranje spomenika „ŠTO TE NEMA“

**Lokacija:** Informativni centar Sarajevo u Vijećnici

**Vremenski okvir:** 03.07.2025. godine

**Satnica:** cjelodnevno

**Učesnici aktivnosti:** delegacije Grada Sarajeva, strane delegacije, diplomatska predstavništva u BiH, delegacije, predstavnici različitih nivoa vlasti u BiH, predstavnici relevantnih udruženja, akademici, umjetnici, istraživači, učenici i studenti.

**Obrazloženje:** Akademska istraživanja ratnih zločina sa pravnog, historijskog, sociološkog, filozofskog, politološkog i psihološkog aspekta za mlade iz cijele BiH.

Interaktivno predavanje i radionica o suočavanju s prošlošću, važnosti arhiva haškog Tribunala u borbi za istinu i pravdu, te potrebnim koracima za izgradnju mira i pomirenja.

**Naziv aktivnosti:** Kolektivno i participativno kreiranje spomenika „ŠTO TE NEMA“

**Lokacija:** Trg preko puta sarajevske Vijećnice / Trg Prve brigade policije

**Vremenski okvir:** 04.07.2025. godine

**Satnica:** cjelodnevno

**Učesnici aktivnosti:** delegacije Grada Sarajeva, strane delegacije, diplomatska predstavništva u BiH, delegacije, predstavnici različitih nivoa vlasti u BiH, predstavnici relevantnih udruženja, akademici, umjetnici, istraživači, učenici i studenti.

**Obrazloženje:** „Šta znači stvarati umjetnost kao oblik tugovanja, iscjeljenja i otpora nakon gubitka, destrukcije i nasilja koje su naše zajednice preživjele?“ - Kolektivno i participativno kreiranje spomenika ŠTO TE NEMA s više od 8.372 prikupljena fildžana u znak sjećanja na žrtve genocida u Srebrenici. Pitanja pamćenja, pripadnosti, tugovanja i iscjeljenja biće istražena kroz razne aktivnosti u kontekstu kolektivne memorijalizacije u javnom prostoru. Ovaj participativni rad pamćenja kroz edukativne i vizuelne aktivnosti nadilazi tradicionalne načine komemoriranja i povezuje tkivo društva kako bi stvorio modele za međugeneracijsko sjećanje na genocid i njegovu prevenciju. Pomenuti spomenik u vidu izložbe u kojoj će mladi ljudi i građani uzeti učešće gdje će biti pozvani da promišljaju o izložbi i genocidu u Srebrenici, odavajući pijetet žrtvama. Kreiranjem ove vrste spomenika građani i mladi ljudi nisu nijemi promatrači već se pozivaju da promisle o posljedicama rata. Na ovaj način se budi empatija kod mladih ljudi educirajući poslijeratne generacije o prošlosti kroz platformu umjetnosti.

**Naziv aktivnosti:** „Otvaranje izložbe pod nazivom „Majke/Mothers“, novozelandske umjetnice Nour Hassan

**Lokacija:** Vijećnica Sarajevo

**Vremenski okvir:** u periodu od 6. do 8. jula (datum će se naknadno precizirati)

**Satnica:** naknadno

**Učesnici aktivnosti:** delegacije Grada Sarajeva, strane delegacije, diplomatska predstavništva u BiH, predstavnici različitih nivoa vlasti u BiH, predstavnici Mehanizma za međunarodne krivične sudove u Hagu, predstavnici relevantnih udruženja, umjetnici, mladi ljudi.

**Obrazloženje:** Grad Sarajevo u saradnji sa Centrom za postkonfliktna istraživanja, Udruženjem "Pokret majki enklava Srebrenica i Žepa" i Javnim preduzećem Sarajevo će u sklopu obilježavanja 30. godišnjice od genocida u Srebrenici otvoriti izložbu „Majke/Mothers" novozelandske umjetnice Nour Hassan. Izložba se sastoji od 20 priča/portreta najistaknutijih majki Srebrenice, uključujući i nekoliko portreta žena koje više nisu među nama. Izložba „Majke/Mothers" je dio multimedijalne, edukativne i umjetničke inicijative *Heroine Srebrenice*, koja ima za cilj dokumentovati priče žena koje su preživjele genocid u Srebrenici, njihovu herojsku borbu protiv nekažnjivosti počinitelja i napore da sačuvaju istinu o genocidu.

**Naziv aktivnosti:** Performans „Bol: Srebrenica je zvijezda padalica“, autorice tekstova: Melika Salihbeg Bosnawi, Janja Beč

**Lokacija:** naknadno

**Vremenski okvir:** 09.07.2024. godine

**Satnica:** naknadno

**Učesnici aktivnosti:** akademska zajednica, relevantna udruženja, gradski vijećnici, predstavnici svih nivoa vlasti

**Obrazloženje:** Ovaj performans nastao je za sjećanje i opomenu za Srebrenicu – da se nikome nikada više ne dogodi! Predstava kroz emocije slike, plesa i glumačkog umijeća govori o boli i pretrpljenom užasu srebreničkog naroda, a naročito majki Srebrenice čija je bol neopisiva. Pored boli majki Srebrenice koje je Minka Muftić sa glumicama donijela sjajno na sceni, sada Minka u svom umjetničkom eksperimentalnom opusu se katarzično kreće kroz vrijeme donoseći nam u sklopu ove priče i priču o ratu u Gazi kroz poemu koja će biti izvedena u sklopu istoimene predstave. Dužni smo odati počast majkama Srebrenice i žrtvama genocida ali smo isto tako dužni govoriti o Gazi i nevinim civilima i djeci koja su nažalost još uvijek u jeku rata. Radi velikog interesa građana koji su bili spriječeni prisustvovati predstavi koja je bila upriličena u sarajevskoj Vijećnici tokom 2024. godine, ponovno je prikazujemo u Sarajevu tokom 2025. godine, u saradnji Grada Sarajeva Informativnog centra i autorice Minke Muftić kako bi dostojanstveno obilježili 30 godina od genocida u Srebrenici.

**Naziv aktivnosti:** Djelo Oratorij „Lamentoso Srebrenici“ u izvedbi simfonijskog orkestra, kompozitora Emira Nuhanovića u produkciji Fondacije za umjetnost i obrazovanje „AMAMDEUS“

**Lokacija:** Vijećnica Sarajevo

**Vremenski okvir:** 11.07.2025. godine

**Satnica:** naknadno

**Učesnici aktivnosti:** akademska zajednica, relevantna udruženja, gradski vijećnici, predstavnici svih nivoa vlasti

**Obrazloženje:** 11. juli, dan kada se na simboličan način odaje počast žrtvama i porodicama stradanim u genocidu u Srebrenici, gdje se na dostojanstven način izražava saučešće i suosjećanje s porodicama žrtava genocida. 11. jula, Grad Sarajevo simboličnim spuštanjem zastava na pola koplja, oglašavanjem sirena i spuštanjem cvijeta Srebrenice na sarajevskoj Vijećnici, prisjeća se žrtava genocida. Na taj dan se u Potočarima organizuje ukop posmrtnih ostataka žrtava. Obzirom da se radi o obilježavanju 30. godina od genocida u Srebrenici na 11. juli 2025. godine, planirat će se projekcija 8.372 imena i prezimena ubijenih u genocidu u Srebrenici na fasadi Vijećnice. Upravo radi osjetljivosti događaja na taj dan se ne organizuju programske aktivnosti, već se šutnjom i odavanjem počasti za sve one koji nisu preživjeli i za kojima se još traga, daje simbolična podrška Memorijalnom centru Potočari i Udruženju „Majke Srebrenice enklava i Žepa“ u vidu navedenih aktivnosti. Obzirom na značaj obilježavanje 30. godišnjice, u sklopu muzeja Informativnog centra Sarajevo, koji se nalazi u mezaninu Vijećnice, na TV ekranu će se puštati audio materijal iz djela Oratorij „Lamentoso Srebrenici“ (kojeg je komponovao Emir Nuhanović) sa velikim simfonijskim orkestrom, u produkciji Fondacije za umjetnost i obrazovanje „AMADEUS. Ova instrumentalna izvedba ostaje trajno zapisana i još jedanput se ovjerava historijski kontekst počinjenog genocida u Srebrenici koji predstavlja trajni dokaz, a nama se ostavlja u amanet da se uvijek sjećamo kao i da nikada ne zaboravimo genocid u Srebrenici.

### **III REALIZACIJA PROGRAMA I LOGISTIKA**

Za potrebe realizacije Programa formirat će se Organizacioni odbor koji će se potom podijeliti u timove koji će biti zaduženi za različite aktivnosti, uz obavezu koordiniranog djelovanja i održavanja zajedničkih sastanaka. Organizacioni odbor bit će zadužen, između ostalog, za: korespondenciju, organizaciju događaja, ishodovanje potrebnih dozvola, sačinjavanje listi učesnika, slanje poziva, protokolarnu aktivnosti, provođenje potrebnih nabavki i sl.

Organizacioni odbor bit će ovlašten i da izvrši dodatno preciziranje lokacija, satnica, učesnika i zvanica.

Odsjek za informiranje (Press služba) Grada komunicirat će sa medijima sačinjavati saopćenja i medijske najave.

Sve potrebne nabavke za realizaciju cjelokupnog Programa provodit će se u skladu sa važećim propisima.

### **IV FINANSIJSKA SREDSTVA**

Za potrebe realizacije Programa potrebno je u budžetu Grada Sarajeva za 2025. godinu planirati 15.184, 53 KM. Grad će tražiti i dodatnu finansijsku podršku općina u sastavu Grada i ostalih nivoa vlasti u BiH.

**GRADONAČELNICA**

**Prof. dr. Benjamina Karić, s. r.**

Broj: 01/08-04-6095-1/24  
Sarajevo, 16.10.2024. godine